

Alch dez ich vß warer ver-
stentniß vylter menschen auch manigerlei sterrē
vernōmen/ die do eintregtiglich sagten dyßen
Cometen yn erschynen vnder den ersten zweyert
redern des Wagens: den dy Latinischen nen-
nen vrsam maiorem/ Das ist den grossen bern:

vnd hab vßgebreit oder gestreckt sein bart oder schwantz zu den
festen redern des selbigen wagens/ gleich zwischen miternachte
vnd vffgang der Sōnen/ hab ich nicht anders dar vß mdgē er-
teilen (doch alwege furbehalten der andern gut beduncken vnd
meinung) dan das dieser Comet erschynen sey bey den hynderste
füssen des Bern/ die do gezirt sein mit etlichē sternnen von der na-
tur Martis/ bey welchen gegen der Sōnen circel zu/ genant E-
cliptica/ das gebildnis des Lewen sich erzeiget: welchs vff seynez
ruck erlicht ist durch die stern der andern grōß/ vñ seyn schwantz
gezyret mit ein claren hellen stern der ersten grōß Es sein auch
nit weit vō diesem gebildnis etlich fest stern die durch die Astro-
nomos nebulose vñ oculte/ das ist dunckel vñ verborgē stern:
genant sein/ bei welchen über: gegē der vorgeñaten ecliptica ge-
sehen wirt das bildnis vñ zeychen der iungfrawen Nūn dysem
nach ist wol geleich der warheit das dieser Comet gestanden sei
vnder dem wagen/ der sein vrsprunck ein teil von dem Lewē vñ
ein teil von der Jungfrawē genōmen hab/ Zu bezeugen dyesen
vrsprung Nym ich zu dez ersten die zusamēfügūg Jupiters vñ
Martis in der Jungfrawen/ welch (als Albumasar bekent im
achten buch seiner grossen Cōiūction im ersten capitel) nit we-
nig gethon hat zu der geberung diß Cometen/ welchen ich durch
die selbige sein vnd ander meinūg in meiner Practica des iares
M.CCCC.VI. zukünftig gesagt hab/ Zum Andern wirt diß be-
stetigt durch das finsterniß der Sōnen so diß iar auch gewesen
vñ am XXtag des Heynonds gesehen wordē ist im VI. grad des
Lewen in welche vil Planeten: nit lang darnach kōmen sein in
die stat des finsterniß/ Auch so hat zu diesem Cometen nit eyn
wenig gethō die zusamēfügūg Saturni vñ Martis im Lewē
Vß dieses also kurzlich begriffen solman nūn wissen das dyser
Comet sein vrsprūg hat ein teil von der Jungfrawē vñ eyn teyl
vō dez Lewen/ vñ weit gegen mitternacht vñ gegē nydergang